



Kamis, 1 Agustus 2024

Ogen: Keluaren 2:1-10



"Pepinemken Anak"



ASI ertina air susu ibu, salah sada pemere Dibata si meherga kal ergana. I bas ASI e lit kandungan-kandungan si tuhu-tuhu mehuli man pertumbuhan danak-danak, termasuk pe guna kekebalan tubuhna. ASI e la tergantiken alu kai pe. Sabap selain ASI e jine, proses mere minem ASI man anakta em si erbahanca lit ikatan batin si megegeh antara nande ras anakna. Sanga lit kebiaren erkiteken prentah Firaun maka kerina anak-anak kalak Israel si umurna 2 tahun ku teruh si tading Mesir arus ibunuh, ceda akal ate orang tua Musa. Anakna si mbaru tubuh e, ola min sempat bene atena, e maka nande ras turangna, ngaturken gelah Musa e, iombakken ku lau i ja anak Firaun si diberu rusur i je ridi, mbera kari mekuah atena, janah iabuatna anak e. Payo, seh me bagi sinisurana. Ibuat anak Firaun si diberu e Musa si kitik denga. Tapi anak e kitiksa denga, langa ngadi minem. E maka alu pengaturken Tuhan, banci nandena bengket ku istana guna mere minem man Musa. Seh kal riahna akap sekalak nande adi banci ngidah anakna selamat, dengen sehat, janah banci ka nandena ngangkipa dengen mpepinemken man bana. Bage me maka Musa banci tetap nggeluh sue ras peraten Dibata.

Mere minem ASI i bas cakap Inggrisna e me *nurturing*, erti kata enda banci ka iterjemahken **merawat**. Mere minem man anakta ertina kita merawat ia, gelah mbelin, sehat ras mencapai tingkat pertumbuhan si maksimal guna jangka panjang kegeluhenna. Melala ibahan kalak gelah banci reh ASIIna, tupung paksa natang tuah ibersihina, iurutna, ikompres tentenna, panna pangan si sehat ras bergizi. Kenca ia mupus adi langa ndarat ASI, ipanna bulung katu, sira lada. Perjuangan mere minem e megati lanai ngeraken kerna mela, sabap la lit man kemelanken i bas kita merawat 'buah ateta'. Megati pe langlang pertunduh. Tapi i je me puncak kebahagiaan tertinggi, sanga si idah anakta badeh pertunduhna, teneng ia bas ampunta. Ola erleja-leja nande, i bas mereken perawatan man anakndu.